

Headline	Puspakom edar buku panduan pemeriksaan bas		
MediaTitle	Utusan Malaysia		
Date	18 Mar 2016	Color	Full Color
Section	Dlm Negeri	Circulation	171,663
Page No	28	Readership	563,000
Language	Malay	ArticleSize	122 cm ²
Journalist	N/A	AdValue	RM 2,433
Frequency	Daily	PR Value	RM 7,299



Puspakom edar buku panduan pemeriksaan bas

SHAH ALAM 17 Mac -Puspakom Sdn. Bhd. (Puspakom), akan mengedarkan 5,000 naskhah buku panduan pemeriksaan bas terbitan khas secara percuma kepada semua persatuan pengusaha bas di negara ini bermula bulan ini.

Ketua Pegawai Eksekutif Puspakom, Mohammed Shukor Ismail berkata, tujuan pengedaran buku itu dibuat adalah untuk memberi pendedahan lebih jelas berhubung piawaian pemeriksaan bas sekolah, bas pekerja, bas ekspres dan bas persiaran yang perlu dipatuhi kepada semua pengusaha bas.

Menurutnya, buku itu akan diedarkan kepada semua pemandu dan pengusaha bas di semua cawangan Puspakom yang ada menjalani pemeriksaan terhadap kenderaan bas.

"Atas sambutan pengedaran buku panduan teksi pada Januari lalu yang sangat menggalakkan, pihak kami meneruskan inisiatif ini dengan menerbit dan mengedarkan buku panduan bas pula untuk memberi maklumat dan kesedaran kepada pengusaha bas.

"Bagi memudahkan mereka, buku ini juga boleh diperolehi di laman web Puspakom dengan memuat turunnya secara percuma," katanya dalam satu kenyataan di sini semalam.

Mengulas lanjut, Mohammed Shukor berkata, Isi kandungan buku panduan ini memperincikan semua tahap pemeriksaan termasuk pemeriksaan bahagian atas bawah kenderaan, ujian pengeluaran asap, pemeriksaan gelincir sisi, suspensi, meter laju, lampu puncak dan brek.

"Kami berharap buku panduan ini dapat membantu mereka untuk lebih memahami serta mematuhi Akta Pengangkutan Jalan 1987 dalam memastikan bas mereka berada pada tahap yang baik dan selamat.

"Ini secara tidak langsung dapat meningkatkan keselamatan penumpang, pemandu dan juga pengguna jalan raya yang lain," jelasnya.